

新纂雲南通志卷四目錄

大事記四

中古代三

第六期

始唐開元二十六年戊寅
迄唐昭宗天復元年辛酉

第七期

始唐昭宗天復二年壬戌迄
後唐末帝清泰二年乙未

第八期

始後晉天福元年丙申迄
宋理宗淳祐十一年辛亥

新纂雲南通志卷四

大事記四

中古代第六期

始唐開元二十六年戊寅訖唐昭宗天復元年辛酉凡一百

六十四年即公曆七三八年至九零一年

開元二十六年九月封西南大酋蒙歸義為雲南王冊府元龜卷九六四

唐會要開元二十六年詔授特進皮羅閣越國公賜名歸義通鑑

歸義之先本哀牢夷地居姚州之西東南接交趾西北接吐蕃蠻

謂王曰詔先有六詔曰蒙舍曰蒙越曰越析曰浪穹曰漾備曰越

澹原注考異曰新書六詔曰蒙巋越析浪穹遠施浪蒙舍今從寶澹雲南別錄兵力相埒莫能相壹歷代因之以分其勢

蒙舍最在南故謂之南詔高宗時蒙舍細奴邏初入朝細奴邏生

邏盛邏盛生盛邏皮盛邏皮生皮邏閣原注考異曰新傳云蒙氏父子以名相屬細奴邏生

娠生盛邏皮喜曰我又有子雖死唐地足矣炎開立死開元時弟盛邏皮立生皮邏閣授特進臺登郡王炎閣未有子時以閣邏鳳為嗣及生子還其宗而名承閣遂不改按邏盛炎之子盛邏皮豈得云以名相屬既有炎閣豈得云我又有子雖死唐地足矣今從

舊南詔傳及楊國忠傳雲南別錄又舊南詔傳閣皆從閣今從新傳皮邏閣浸疆大而五詔微弱會有破洱河蠻之

功原注洱河即西洱河乃賂王昱求合六詔為一昱為之奏請朝廷許之仍賜名

歸義於是以兵威脅服羣蠻不從者滅之遂擊破吐蕃徙居太和

城其後卒為邊患原注南詔事始此其先烏蠻別種夷語山城陀為和故謂之太和城

張氏道宗曰歸義立名魁樂覺遣部將平五詔時開元十五年也

唐册王為特進雲南王越國公開府儀同三司自唐特進之後永

昌諸緬暹大秦此皆西通之國交趾八百真臘占城撾國此皆南

通之國俱以奇珍金寶歲進不缺記古漢說

楊氏慎曰南詔浸疆大五詔微弱皮邏閣因仲夏二十五日祭先

之期建松明樓以會五詔宴醉後擊鼓舉火焚樓五詔遂滅

滇載記

案古滇說太夸滇載記太略不如通鑑得實

又案六詔之地皆在迤西越析則兼跨蜀邊故兩林屬牟尋會川屬段實言滇事者烏可缺如阮岑志概刪之非也

備覽○皮邏閣招聚五詔遺酋焚之

諸葛元聲滇史

唐書南詔傳浪穹詔鐸羅望與南詔戰不勝挈其部保劍川更稱劍浪傳望偏偏羅矣羅君貞元中南詔破之徙永昌最後亡

蠻書云矣羅子孫在蕃中又云南詔既破劍浪遂遷其部落與施

順諸蠻居養給之

按元史地理志永寧北勝等地皆異牟尋用兵始定即施蠻順蠻諸地

檀氏萃曰考澄睽詔豐咩爲御史李知古所殺其子咩羅皮徙澄川爲皮邏閣所敗復歸澄睽與浪穹施浪合兵拒南詔卒不勝皮

邏閣奪澄睽咩羅皮走保野共川傳皮羅澄澄羅顛顛文托南詔破劍川徙顛文托於永昌其本末如此未見焚死之詔爲慈善之夫也至蒙嵩自嵩詔輔首傳佉陽照原原羅皮邏閣使人殺照原逐原羅遂有其地亦不著焚死事越析詔自波衝被弑地歸南詔其兄子于贈持鐸鞘渡瀘邑於龍佉河閣邏鳳破之投水死浪穹詔自豐時羅鐸鐸羅望望偏偏羅矣羅君凡六世貞元間南詔虜羅君徙永昌施浪詔施望欠敗走永昌溺死弟施望于以吐蕃力保劍川南詔破之其子于勞羅顛瀘北與矣川羅識子在吐蕃故自皮邏閣奪五詔地其王或滅或徙俱未有焚死事恐傳聞之訛也今寧北妃廟蓋祀慈善云

農部版錄卷二

王氏崧曰寧北妃即慈善夫人今太和鄧川浪穹俱立廟祀之又

曰白姐聖妃德源城在今鄧川城東之慈善夫人之智烈至今稱道不衰而古蹟具在其事定非子虛也南詔世家注

案默齋不信野史允已樂山表章節義亦佳第讀書貴識立言有體如金馬碧雞誤在昆明本在青蛉金枝鐵立詩傳段氏與其過而

廢也毋寧過而存之松明樓德源城即此類也詞章家用之不失典雅舟屋月榭蓋嘗信之然即信以為掌故恐太過耳

又案德化碑蠻書新舊唐書通鑑言蒙氏滅五詔設謀甚久用兵甚詳收功甚勞不言焚松明樓即大成功乃滇載記獨開焚樓之說人多從之滇史蓋疑其訛又改為焚遺曾皆非也

授皮羅閣長男閣羅鳳特進兼陽瓜州刺史次男成節度蒙舍州刺史次男崇江東刺史次男成進雙祝州刺史蠻書

案唐厚于歸義諸子皆授刺史而成則兩為刺史故樊綽兩載之阮志以成爲一人成進又爲一人疑誤

開元末皮羅閣逐河蠻取太和城又襲大釐城守之因城龍口唐書南蠻傳

南蠻傳山坡陀爲和故謂太和以處閣羅鳳

天寶四載閣鳳長男鳳伽異入朝授鴻臚少卿蠻書

賜胡部及龜茲音聲各兩部蠻書

七載蒙歸義卒閣羅鳳立朝廷册襲雲南王以其子鳳伽異爲陽瓜

州刺史蠻書

德化碑天寶七載先王即世

唐會要天寶七載歸義卒

以黎敬義爲中使册立閣羅鳳爲雲南王德化碑

案皮羅閣雖受封雲南王未統一滇境閣羅鳳乃名實相副此為雲南二字由縣名升郡名且升為全滇名之始

九年楊國忠以鮮于仲通為劍南節度使雲南太守張虔陀淫虐閣羅鳳遂陷雲南僭號大蒙國

仲通失蠻夷心閣羅鳳發兵反殺虔陀取夷州三十二通鑑

殺虔陀取屬州三十二陷嵩州獲唐西瀘令鄭回拜清平官漢載記

異牟尋誓文云天寶九載被姚州都督張乾陀等離間部落因此

與漢阻絕寶善

案乾陀或作虔陀或誤雲南太守又誤為七載當依蠻書改定十

年四月鮮于仲通討南詔大敗於瀘南舊唐書本紀

閣羅鳳斂戰尸築為京觀遂北臣於吐蕃蠻語謂弟為鍾吐蕃命

閣羅鳳為贊普鍾號曰東帝給以金印新唐書南蠻傳

仲通將兵八萬分二道出戎嵩州至曲州靖州進軍西洱河大敗

仲通僅以身免通鑑

鮮于仲通戰於瀘川官軍大敗死於瀘水者不可勝數舊唐書本紀

鮮于仲通將命致討鳳伽異及段儉魏逆戰唐兵死者六萬人仲

通僅以身免漢載記

十二年五月以左武衛大將軍何履光將嶺南五府兵原注廣桂邕容交擊南詔

通鑑

案南詔入唐昔俱由蜀今乃以交廣兵擊之後日之南詔遂大

擾交廣無已履霜之漸蓋微矣

十三年六月侍御史劍南留後李宓率兵擊雲南蠻於西洱河宓被

擒舉軍皆沒舊唐書本紀

自仲通李宓再舉討蠻之軍凡舉二十萬衆棄之死地隻輪不還

舊唐書楊國忠傳

存疑○黔中都督趙國珍敗南詔新唐書

案通鑑十一載吐蕃兵救南詔劍南兵擊破之於雲南克故隰州等三城事或有之新唐南蠻傳趙國珍天寶中戰有功閣羅鳳叛楊國忠以國珍有方略授黔中都督屢敗南詔此乃唐兵之未沒者國忠僉壬往往諱敗為功恐難盡信

肅宗至德元年南詔陷越嶲會同軍據清溪關尋傳驃國皆降之通鑑

築城摩零山管理尋傳等五道事蠻書

通鑑考異云唐歷吐蕃陷嶺州新傳閣羅鳳取嶺州蓋二國兵共

陷也

胡氏三省曰新書尋傳蠻俗無絲纊跣履荆棘不以為苦射豪豬生食其肉戰以竹籠頭如兜鍪驃古朱波也在永昌南二千里去京師萬四千里南屬海北南詔

蠻書閣羅鳳西開尋傳南通驃國又云尋傳蠻閣羅鳳所討定也又云越禮城在永昌北臨祿鄆江又西至尋傳大川城又云特于摩零山上築城置腹心管理尋傳等五道事又云諾矣江東折流至尋傳部落與麼些江合環遶弄視川南流過鐵橋上下磨些部落即謂之磨些江至尋傳與東瀘水合東川至曾同川謂之瀘水案陳文景泰圖經騰越境內峨昌蠻即尋傳蠻也是騰越一帶之地當即尋傳德化碑云爰有尋傳疇壤沃饒人物殷湊南通

勃海西近大秦開闢以來聲教所不及義皇之後兵甲所不加
詔欲革之以衣冠化之以禮義十一年冬親與寮佐兼總師徒
刊木通道造舟爲梁輝以威武喻以文辭歛降者撫慰安居抵
捍者繫頸盈貫矜愚解縛擇勝置城裸形不討自來祈鮮望風
而至毛奇齡蠻司志作傳尋誤或以西近大秦當爲今之布哈爾諸部南通勃海
當爲今孟加拉諸海竊謂今之緬甸古揮國而後漢書有揮國
西南通大秦之語當時地理不明碑文誇張謂緬怒一帶爲西
近大秦南通勃海亦無不可且碑文又云西湖尋傳祿邨出麗
水之金寶去金江不遠且與蠻書瀘水之源合又云觀兵尋傳
舉國來賓可見當日雄略近在騰越怒求遠在藏緬不愧耀武

築城之頌也已

桂馥云唐書言祈鮮山之西多瘴歎即碑祈鮮望風而至

又案唐宋元代之地理古名惟遼史尋思干與尋傳音相近李
志常述西記作邪迷思干劉郁西使記作罽思干似皆尋傳對
音顧丁謙地理考證謂邪迷思干即撒馬兒罕又罽思干城城
大而民繁雖與碑文人物殷湊合但南詔兵力疑不能遠至西
域今仍闕之而以景泰圖經騰越爲據且推及怒求藏緬之邊
爲古尋傳當無大誤

代宗廣德初鳳伽異築拓東城

新唐書南蠻傳

蠻書拓東城廣德二年鳳伽異所置也其地漢舊昆川故謂昆池
案此爲今昆明城之始元明續有修改耳

又案德化碑云安寧雄鎮諸蠻要衝城邑綿延勢連戎楚乃置
城監用輯携離遠近因依閭閻櫺比十二年冬詔候隙省方觀

俗卹隱次昆川審形勢言山河可以作藩屏川陸可以養人民十四年春命長男鳳迦異於昆川置拓東城居二詔佐鎮撫于是威懾步頭恩收曲靖頒誥所及翕然俯從又云南荒濇湊覆詔願爲外臣東爨悉歸步頭已成內境又云兼瓊秉節貪榮構亂開路安南政殘東爨又云巡幸東爨懷德歸仁樊綽云拓東至通海八日程通海至步頭十四日程建都鎮塞候隙省方至是而兩爨之境悉帖然而入南詔拓東城築名曰別都亦曰東都閣羅鳳巡幸省方爨民蚩蚩亦惟感新朝恩惠而正史之上無復有爨氏王侯赫赫之跡也

又案兩爨遺迹以大小爨碑爲表表豈有千年中漢晉正傳之文化乃僅僅傳二三碑耶愚謂爨之亡也南詔以兵脅西爨徙

戶二十餘萬于永昌自曲靖至龍和皆殘於兵烏蠻以言語不通得不徙後徙居西爨故地分七部落其語四譯乃通大部落有大鬼主小部落有小鬼主勿鄧地方千里有五姓一姓白蠻五姓烏蠻又有初裏五姓皆烏蠻也蓋雜居也破劍川俘矣羅君徙永昌又收野共俘顛之託

原注新唐書作顛文託

徙永昌又破掠吐蕃城

收獲弄棟城遷于永昌之城又破鐵橋獲裳人數千戶悉移于雲南東北諸川又破劍浪遷長禪蠻部落與施順諸蠻居養給之又浪詔破敗復徙西洱河蠻于雲南東北拓東以居又虜施蠻王尋羅並宗族置于蒙舍城養給之又虜順蠻王彌潛宗族置于雲南白崖養給之又虜獲磨蠻萬戶盡分隸昆州左右又破施蠻順蠻並虜其王置白崖城因定磨些蠻隸昆山西爨故

地破茫蠻掠弄棟蠻以實雲南又掠驃民三千徙之拓東參唐書

竊謂蒙氏之興專恃武功喜移民以消後患獨不思莊王從俗

武侯攻心乎不僅此也千數年之文獻典章舊者已灰新者難

續除二三碑文外悉勞後人之鉤稽如披荆如揀沙尙未必十

得五六王阜王遜寶子龍顏諸賢哲經營培養皆就漸滅何其

痛也况明以後之紛紛去籍乎

大歷元年立德化碑

案德化碑一名蒙國大詔碑即唐書所謂揭碑國門留指唐使

者王蘭泉金石萃編疑爲二碑非也俗呼磨刀石有患瘡者輒

刮灰吞之謂可愈疾故剝融特甚嘉慶中大理知府李亨特建

亭覆之可謂盛事滇中古石自漢孟孝琚碑晉爨寶子碑祥光

碑宋爨龍顏碑唐王仁求碑外此碑當居第六未出土者當復

不少要在好事者隨時加意保存耳德化碑云崇道箴盟構逆罪合謀表而卻令仇我收錄與宿按唐本欲結蒙以攻變而反謂唐收爨以仇

立碑之年在大歷元年通鑑綱目繫於天寶

十一年非也

十四年閣羅鳳卒孫異牟尋嗣連吐蕃入寇神策都將擊破之新唐書南蠻傳

南詔王閣羅鳳卒子鳳伽異前死孫異牟尋立冬十月丁酉朔吐

蕃與南詔合兵十萬三道入寇一出茂州一出扶文一出黎雅曰

吾欲取蜀以爲東府李晟擊之於大渡河外異牟尋懼築苴咩城

延袤十五里徙居之吐蕃封之爲日東王通鑑

貞元四年西川節度使韋皋以書招諭南詔舊唐書南詔傳初雲南王閣羅鳳

陷嵩州獲西瀘令鄭回回相州人通經術閣羅鳳愛重之其子鳳

伽異及孫異牟尋曾孫尋夢湊皆帥事之每授學回得撻之及異牟尋爲王以回爲清平官清平官者蠻相也凡有六人而國事專決於回五人者事回甚卑謹有過則回撻之雲南有衆數十萬吐蕃每入寇常以雲南爲前鋒賦斂重數又奪其險要立城堡歲徵兵助防雲南苦之回因說異牟尋復自歸於唐曰中國尙禮義有惠澤無賦役異牟尋以爲然而無路自致凡十餘年及西川節度使韋皋至鎮招撫境上羣蠻異牟尋潛遣人因羣蠻求內附皋奏今吐蕃棄好暴亂鹽夏宜因雲南及八國生羌有歸化之心招納之以離吐蕃之黨分其勢上命皋先作邊將書以諭之微觀其趣五月己未皋復與東蠻和義王苴那時書原注東蠻跨地二千里勿鄧豐營兩林各大鬼主爲之長苴那時勿鄧鬼主也使訶何導達雲南六月皋以雲南頗知書自以書招諭之令趣遣使

入見通鑑

雲南王異牟尋欲內附未敢自遣使先遣其東蠻鬼主標旁按即兩林苴夢

衝按即勿鄧苴烏星按即豐營入見五月乙卯宴之於麟德殿賜賚甚厚封王給印

而遣之原注封驃旁爲和義王苴夢衝爲懷化王苴烏星爲順政王通鑑

案今川邊也昔屬南詔故通鑑云雲南王遣其東蠻鬼主通志概以蜀事而削之何以窺當日事實耶

九年異牟尋求入朝

案舊唐書牟尋有才智頗知書不載其文新唐書貞元九年牟尋使三人異道同趣成都遺韋皋書曰異牟尋世爲唐臣云云即求入朝之文也

又案異牟尋誓文云貞元四年奉劍南節度使韋皋僕射書具

陳漢皇帝聖明懷柔好生之德七年又蒙遣使殺段思義等招諭兼送皇帝敕書書是知唐收南詔乃牟尋願降唐唐亦招牟尋非僅牟尋一面之求也

七年韋皋使嵩州刺史蘇隗殺勿鄧部落大鬼主苴夢衝書

勿鄧地方闊千里邛部一姓白蠻五姓烏蠻內受恩賞於國外私

于吐蕃皋殺之書

案通鑑作八年春斬夢衝雲南之路始通

韋皋遣西川判官崔佐時赴雲南書

十年正月異牟尋與崔佐時盟於點蒼山神舊唐書南蠻傳

通鑑貞元十年崔佐時至雲南所都羊苴咩城吐蕃使者數百人

先在其國雲南王異牟尋尚不欲吐蕃知之令佐時衣牂牁服而

入佐時不可曰我大唐使者豈得衣小夷之服異牟尋不得已夜

迎之佐時大宣詔書異牟尋恐懼左右失色業已歸唐乃歔歔流

涕俯伏受詔鄭回密見佐時教之故佐時盡得其情因勸異牟尋

斬吐蕃使者去吐蕃所立之號獻其金印復南詔舊名異牟尋皆

從之原注考異曰舊韋皋傳四年正月皋遣判官崔佐時至苴咩城按西南夷事狀四年皋微聞異牟尋之意始因諸蠻寓書於牟尋自是比年招諭至九年牟尋始遣使與皋書以來朝廷賜之詔書皋乃遣佐時齎詔以往牟尋猶欲使佐時易服

而入皋傳誤也仍刻金契以獻異牟尋帥其子尋夢湊等與佐時盟于點蒼

山神祠先是吐蕃與回鶻爭北庭大戰死傷甚衆徵兵萬人於雲

南異牟尋辭以國小請發三千人吐蕃少之益至五千乃許之異

牟尋遣五千人前行自將數萬人踵其後晝夜兼行襲擊吐蕃戰

於神川大破之取鐵橋等十六城原注鐵橋在施蠻東南據新書是戰也異牟尋破施順二蠻並虜其王置白崖城又據新志自戎州開邊縣南行至白崖城三

千里而近南詔傳曰南詔居永昌姚州之間鐵橋之南虜其五王降其衆十餘萬戍戍遣使來獻捷通鑑

異牟尋遣崔佐時歸仍刻金契以獻

舊唐書南詔傳

案太平廣記卷四百八十三引玉谿編事載南詔驃信五古詩一首亦見錦繡萬花谷所謂避風善闡臺極目見藤越悲哉古與今依然烟與月卓然唐音惜未詳為何詔考舊唐書南詔傳貞元十年牟尋遣崔佐時歸仍刻金契以獻閣勸賦詩以餞之是南詔驃信能詩者當以閣勸為著烟月之篇疑即其作傳又載閣勸即尋夢湊白天寶中閣羅鳳虜鄭回歸以回有儒學甚愛重之命教鳳伽異及異牟尋牟尋立又令教其子尋夢湊回久為蠻師凡授學雖牟尋夢湊回得撻楚故牟尋以下皆嚴憚之回本相州人舉明經蒙氏詩學基于此矣

異牟尋設鐵橋節度使

書蠻

新纂雲南通志

卷四 大事記四

蠻書雲南柘東永昌寧北鎮西開南銀生設七節度得吐蕃鐵橋

又設其一

程大昌言七節度不言其一

案七節度之設史無明文不知何年以蠻書考之知在貞元十年前而鐵橋節度則在十年後西藏為晉禿髮唐吐蕃之地

吐蕃即禿

髮轉音向慕華風佛教東來華風乃變然固我中華之士也駐藏大

臣執其政權三百年歷史具在寧可誣乎唐貞元十年異牟尋以滇兵入藏取鐵橋新設一節度管之而滇藏間之木氏土司亦漸拓中甸維西邊境俾屬於滇滇藏之關繫如此

詔袁滋册異牟尋為南詔

雲南別錄

癸丑以祠部郎中袁滋為册南詔使

原注考異曰舊南詔傳十年八月遣湊羅棟獻吐蕃印新傳曰異牟尋與崔佐時盟點蒼山敗突厥於神川明年六

月册異牟尋為南詔王按實錄乃今年六月新舊傳皆誤也章奏狀皆稱雲南王而寶滂雲南別錄曰詔袁滋册異牟尋為南詔蓋從其請南詔之名自此始也蠻語詔即王也新傳云南詔王亦誤余按牟尋破吐蕃於神川考異誤作突厥賜銀

窠金印文曰貞元册南詔印滋至其國異牟尋北面跪受册印稽首再拜因與使者宴出元宗所賜銀平脫馬頭盤二以示滋又指老笛工歌女曰皇帝所賜龜茲樂惟二人在耳滋曰南詔當深思祖考子子孫孫盡忠於唐異牟尋拜曰敢不謹承使者之命通鑑

賜銀窠金印文貞元册南詔印

唐書本紀唐會要

以祠部郎中兼御史中丞袁滋為册南詔使

舊唐書

大唐貞元十年

年下字跡湮沒疑當為歲在甲戌四字甲字之跡猶可見耳

九月二十日雲南宣慰使內給事

俱文珍判官劉幽巖小使吐突承璀持節册南詔使御史中丞袁滋副使成都少尹龐頎判官監察御史崔佐時同奉恩命赴雲南册蒙異牟尋為南詔其時節度使尚書右僕射成都尹兼御史大夫章皋署巡官監察御史馬益統行營兵馬開路直驛故刊石紀

之袁滋書

豆沙關摩崖

唐地理志戎州下袁滋與劉貞諒使南詔由此

貞諒即俱文珍見新唐二百七卷

高駢牒文云六詔并為一藩與開道途得接印蜀賜書習讀降使交懽禮待情深招延意厚傳周公之禮樂習孔子之詩書

異牟尋遣曹長段南羅各同倫判官趙伽寬等九人與南詔清平官尹輔曾及親信李羅札將大馬二十四匹迎子弟羽儀六人沿路視事十五日至安南城城使段伽諾出步軍二百隊馬軍一百隊夾道排立帶甲馬六十隊引前步槍五百人隨後去城五十里迎候十九日到曲驛鎮使楊盛出馬軍一百三十隊步軍一百七十里隊夾道排立帶甲馬二百人引前步槍三百人隨後去驛一十里迎接二十一日過吹舍川首領父老百餘人蠻夷百姓數千人路

傍羅列而拜馬上送酒雲南節度將五十馬匹來迎二十三日到雲南城節度蒙酋物出馬軍一百隊步軍三百人夾道排立帶甲馬一十隊引前步槍五百人隨後去城一十里迎候門前父老二百餘人吐蕃封王數人在路迎拜是日南詔使大將軍兼戶曹長王咎苴來迎二十四日到白崖城城使尹瑳出馬軍一百隊步軍二百隊夾路排立引馬六十四步槍五百人去城五里迎候南詔遣大軍將李鳳嵐將細馬一千匹並伎樂來迎渠斂道中路客館館前父老二百餘人蠻夷百姓五六十人路迎馬前大軍將喻干僉出馬步軍三百隊夾路排立引馬六十四步槍三百人去城五里迎候南詔妹李波羅諾將細馬一十匹來迎入龍尾城客館南詔異牟尋叔父阿思將大馬二百匹來迎二十六日過大和城南

詔異牟尋從父兄蒙細羅勿

武英殿本原注案羅勿原本作四勾今據新唐書改正

及清平官李異傍大

軍將李千傍等將細馬六十四匹來迎皆金鍍玉珂拂髦振鐸

原注案振原本作根

夾路馬步軍排隊二十餘里南詔蒙異牟尋出陽苴咩城迎

今據新唐書改正

先飾大象一十二頭引前以次馬軍隊以次伎樂隊以次子弟持

斧鉞南詔異牟尋衣金甲披大蟲皮執雙鐸男蒙閣勸在傍步槍

千餘人隨後馬上祇揖而退貞元十年十月二十七日陽苴咩城

具儀注設位旌節當庭東西特立南詔異牟尋及清平官以下各

具儀禮面北序立宣慰南詔使東向立册立南詔使南向立宣勅

書讀册文訖相者引南詔蒙異牟尋離位授册次受貞元十年曆

南詔及清平官以下稽顙再拜手舞足蹈慶退而言曰牟尋曾祖

父開元中册雲南王祖父天寶中又蒙册襲雲南王自隔大國向

五十年貞元中皇帝聖明念錄微效今又賜禮命復觀漢儀對揚天休實感心肺其日樓下大會又坐上割牲用銀平脫馬頭盤二面牟尋曰此是天寶初先人任鴻臚少卿宿衛時開元皇帝所賜比寶藏不敢用得至今又伎樂中有老人吹笛婦人唱歌各年近七十餘牟尋指之曰先人歸蕃來國開元皇帝賜胡部及龜茲音樂各兩部今死亡零落盡只餘此二人在國酒既行牟尋自捧杯擎跽勸讓册立使袁滋引杯醴酒曰南詔當深思祖宗緒業堅守誠信爲西南藩屏使後嗣有以傳繼也異牟尋噓嘻曰敢不承命

書

案樊綽此文整飭詳核蓋得之南詔原册非可臆改一字者敍象馬已足炫奇敍南詔之叔父兄妹尤補史闕且其一言一動

肅穆美備雖千載下猶想見其人宜乎唐書通鑑據爲典要今照錄全文以表古滇人物禮節之盛云

六月雲南王異牟尋遣其弟蒙羅棟獻地圖土貢

蒙羅棟牟尋之弟也賜賚甚厚

舊唐書

異牟尋攻茫蠻部落

書

蠻書貞元十年異牟尋攻其族類

十一年三月清平官尹輔酋等隨袁滋入朝

舊唐書

十一月七日事畢發陽苴畔城清平官尹輔酋十七人奉表謝恩進納吐蕃贊普鍾印一面並獻鐸鞘浪川劍生金瑟瑟牛黃琥珀白氈紡絲象牙犀角越駝馬統備甲馬並甲文金皆方土所貴之物也仍命大軍將王各苴拓東副使杜伽諾具牛羊領鞍馬及丁

夫三百人提荷食物二十四日送至石門書

案南詔遣相尹輔酋及其弟湊羅棟送滋入朝自冬徂春故蠻書舊書紀時皆合

湊羅棟歸國道卒贈右散騎常侍舊唐書

授尹輔酋檢校太子詹事兼御史中丞舊唐書

案孟獲輔酋皆官中朝之中丞可謂至顯輔酋為詹事尤殊榮也

降勅書賜異牟尋及子閣勸清平官鄭回尹仇寬等各一書舊唐書

九月異牟尋遣使獻馬六十四匹舊唐書

十四年異牟尋遣酋望大將軍王丘各等賀正兼獻方物舊唐書

十五年韋皋選羣蠻子弟聚成都就學新唐書南詔傳

孫氏樵曰自南康公鑿清谿道以和羣蠻俾由蜀而貢又擇羣蠻子弟聚於錦城使習書算業就轍去復以他繼如此垂五十年不絕其來則其學於蜀者不啻千百故其國人皆能習知巴蜀土風

山川要害書田將軍邊事

案滇人就學非止習書數也可之云國人皆能習知山川要害殆教澤傳播國人皆學宜其文化武功之盛也名賢謀國豈尋常之舉乎南滇之大幸南康之偉功故亟表之

韋皋使匠教南詔甲弩

初韋皋招南詔以破吐蕃既而蠻訴以無甲弩皋使匠教之數歲

蠻中甲弩皆精利通鑑

十六年正月南詔進奉聖樂舞御麟德殿觀之舊唐書本紀

十九年上御含元殿受南詔朝賀以其使楊鏌龍武爲試太僕少卿受黎州廓清道蠻首領襲恭化郡王劉志寧試太常書唐

案滇人官京卿之盛如此

二十年南詔遣使朝貢書唐

異牟尋遣使楊伽明詣韋皋獻夷中歌曲且令驃國進樂人書新唐

唐書驃國傳云驃在永昌南二千里東陸真臘西接東天竺西南
墮和羅南屬海北南詔長三千里廣五千里東北袤長屬羊苴咩
城又云與波斯婆羅門接距西舍城二十日行西舍利者中天竺

也浙圖書館刻本丁謙地理考證中天竺作東天竺

南詔以兵疆地接常羈制之貞元中王雍羌聞南

詔歸唐有內附心異牟尋遣使楊伽明詣劍南西川節度使韋皋
請獻夷中歌曲且令驃國進樂人於是皋作南詔奉聖樂

憲宗元和二年遣使鄧榜傳來朝授試殿中監書新唐

三年十二月以異牟尋卒廢朝三日書唐會要新唐書

詔太常卿武少儀持節弔祭書唐

遣使弔祭册其子尋閣勸爲南詔王賜元和新印書唐會要

尋閣勸或謂夢湊自稱驃信夷語君也改賜元和印章書唐

案德宗憲宗優禮牟尋輟朝三日尤殊異也

又案蒙氏之盛莫盛於皮羅閣閣羅鳳異牟尋三世唐書南詔
傳及唐人書詳載其都城外交開疆拓土立清平官立節度使
官制兵制工業農業野史稱其封五岳四瀆八方之地屬以八
演從中國教令創制顯庸大約在此數十年中耳

四年正月册牟尋之子驃信苴蒙閣勸爲南詔書唐

案唐會要閣作闔閣闔闔古通用

尋閣勸卒子勸龍晟立新唐書南蠻傳

獅子國攻緬緬求救於王王命救之王本野史

十一年勸龍晟為弄棟節度使王嵯巔所弑立其弟勸利新唐書南蠻傳

詔少府少監李銑為册立弔祭使唐書

寇安南新唐書本紀

案南詔負唐當為嵯巔之罪

穆宗長慶三年賜勸利印新唐書南蠻傳

勸利卒弟豐祐立唐書

豐祐趨敢善用其下慕中國不肯連父名唐書

四年朝廷遣京兆尹韋審規持節臨册豐祐遣洪晟曾趙龍些楊定

奇入謝唐書

文宗太和三年南詔入寇陷邛戎嶯以鄂岳襄鄧忠武軍伐之又寇成都入其郛遣右領軍董質伐之舊唐書本紀

嵯巔陷三州入成都止西郛十日慰賚居人市不擾肆將還乃掠

子女工技數萬引而南自是南詔工文織與中國埒唐書

自是南詔工巧埒於蜀中通鑑

案通鑑郭釗以書責嵯巔嵯巔復書曰杜元穎侵擾我故興兵報之耳又遣使上表曰此行以誅虐帥元穎不遂無以慰蜀士之心願陛下誅之考舊唐書郭子儀傳太和三年冬南蠻陷嶯州遂寇西川杜元穎失於控禦蠻軍陷成都府外城朝廷未暇除帥乃以郭釗兼西川節度使蠻軍寇梓州諸道援軍未至川

軍寡弱不可令戰釗致書於蠻首領嵯巔責以侵寇之意嵯巔曰杜元穎不守疆場屢侵我圍以是修報也與釗修好而退朝廷嘉之授劍南西川節度使與南詔立約疆陲不擾按釗爲汾陽王孫和南詔以止兵禍殆襲其祖和回紇之風嵯巔即王嵯巔蒙氏弄棟節度見通鑑及新唐書新唐稱太和三年嵯巔悉衆掩邛戎嵩三州陷之入成都止西郛十日入當作圍舊書脫其姓爾

四年豐祐上表請罪

唐書

五年西川節度使李德裕索南詔所掠百姓四千人

舊唐書本紀

宣宗大中十二年南詔寇安南陷都護府發朱弩佉苴助守猶歲朝

貢

新唐書朱弩佉苴親衛軍

新纂雲南通志

卷四

大事記四

一八

十二年春正月以康王傳分司王式爲安南都護經略使式有才

略至交趾樹芳木爲柵可支數十年深塹其外泄城中水塹外植

竹寇不能冒選教士卒甚銳頃之南蠻大至

原注南蠻謂南詔蠻也

去交趾半日

程式意思安閑遣譯諭之中其要害蠻一夕引去遣人謝曰我自

執叛獠耳非爲寇也初安南都護李涿爲政貪暴強市蠻中馬牛

一頭止與鹽一斗又殺蠻酋杜存誠羣蠻怨怒導南詔侵盜邊境

原注考異曰舊紀涿侵刻獠民羣獠引林邑蠻攻安南府按蠻書寇安南者南詔非林邑也

峯州有林西原舊有防冬兵六千其傍七

縮洞蠻其酋長曰李由獨常助中國戍守輸租賦知峯州者言于

涿請罷戍兵專委由獨防遏於是獨勢孤不能自立南詔柘東

節度使以書誘之以甥妻其子補柘東押牙

原注交趾在南詔東南南詔于東境置柘東節度言將開拓東境也

由

獨遂帥其衆臣于南詔自是安南始有蠻患是月蠻寇安南

通鑑

案安南都護爲唐設官乃內地也

十三年杜棕奏請減南蠻學習子弟及入貢僦從人數通鑑

南詔怒自是擾邊境通鑑

州鎮釐革南詔入朝人數縱有經過者郵傳殘薄書

雲南事狀中書奏元宗册蒙歸義爲雲南王其子閣羅鳳和于吐蕃其孫異牟尋却歸朝廷自請改雲南王賜號南詔德宗從之至曾孫蒙豐祐杜棕奏以入朝人多減之後素質漸爲侮慢卷末載陳敬瑄與雲南書牒或稱鶴柘或稱大封人胡身之云雲南事狀不著撰人姓似盧攜奏草也

唐大中初雲南朝貢及西川質子人數漸多節度使奏釐革有詞人錄詔報雲南雲南詞不遜詞曰一人有慶方當萬國而來朝四海爲家豈計十人之有費爾後納貢不時境上騷擾宣宗崩命內

臣告哀行及其國南詔王豐祐已死子坦綽酋龍繼立號曰驃信兇很悖慢謂我國亦有喪朝廷不賜弔問詔書又賜故王于是待使者禮薄旋又屢犯封疆掠越嵩朝廷以驃信名近廟諱復無使朝貢不告國喪遂絕册立弔祭使杜棕以雲南向化七十餘年諫仍遣使乃命孟穆爲雲南弔祭使宣撫册命使逗留數月不發棕出鎮鳳翔議多異同復言未可發使乃詔西川令遣使示朝旨爾後連陷城邑徵兵討逐朝貢遂絕土讓唐語林卷三

案新唐書貞元十五年大臣子弟盡舍成都咸遣就學牛叢曰天子許子弟入太學使習華風通鑑皋選羣蠻子弟聚之成都教以書數欲以慰悅羈縻之業成則去後以它子弟繼之如是五十年羣蠻子弟學於成都者殆以千計軍府頗厭于廩給杜

儻爲西川節度使奏請節減其數詔從之南詔豐祐怒其賀冬使者留表付嵩州而還又索習學子弟移牒不遜所謂不遜之文賴王謙以補劉昫宋祁因以歎唐臣反覆無識如此禍唐並禍南詔矣南詔駢文有德化碑大篇餘罕傳謙引四語可見一斑胡曾回南詔牒有曰開緘捧讀詞藻斐然此四語亦不愧斐然之稱矣

豐祐卒子坦綽酋龍立

唐書

案酋龍本名世隆因隆字同於玄宗故唐書改作龍又惡其人故斥之曰酋然懿宗以其名近元宗嫌諱絕朝貢邊蠻大啟殊失輕重矣

世隆立僭稱皇帝建元建極自號大禮國

唐書南蠻傳

新纂雲南通志

卷四 大事記四

一一〇

范氏成大曰南詔皮羅閣封雲南王異牟尋封南詔酋龍改元自稱大禮國今其與中國接乃稱大理國與唐史禮理字異通考引案世隆稱帝僭之至也且載正史故采之若野史所載之蒙段帝號年號概無足取

懿宗咸通元年安南都護李鄴復取播州

原注播州屬黔中道大中十三年爲雲南所陷此非安南道屬也李鄴越境收復欲以爲功而不知蠻兵

乘虛已陷安南也

十二月戊申安南土蠻引南詔兵合三萬餘人乘虛攻交趾陷之

原注考異

曰新南詔傳大中時李涿爲安南經略使苛暴自私以斗鹽易一牛夷人不堪給南詔將段會遷陷安南都護府號白衣沒命軍懿宗絕其朝貢乃陷播州都護李鄴與監軍遼武州

通鑑

二年春正月詔發邕管及鄰道兵救安南擊南蠻

通鑑

夏六月王寬爲安南經畧使李鄴自武州收集土軍攻羣蠻復取安南朝廷責其失守貶儋州司戶鄴初至安南殺蠻酋杜守澄其

宗黨遂誘道羣蠻攻交趾通鑑

秋七月南詔攻邕州陷之通鑑

先是廣桂容三道共發兵三千人戍邕州三年一代經畧使段文楚請以三道衣糧自募土軍以代之朝廷許之所募纔得五百許人文楚入為金吾將軍經畧使李蒙利其闕額衣糧以自入悉罷遣三道戍卒止以所募兵守左右江北舊什減七八故蠻人乘虛入寇時蒙已卒經畧使李宏源至鎮纔十日無兵以禦之城陷宏源與監軍脫身奔巒州二十餘日蠻去乃還杜棕上言南詔向化七十年蜀中寢兵無事羣蠻率服今西川兵食單寡未可輕與之絕且應遣使弔祭曉諭清平官等以新王名犯廟諱故未行册命待其更名謝恩然後遣使册命庶全大體上從之命左司郎中孟

新纂雲南通志

卷四 大事記四

一一一

穆為弔祭使未發會南詔寇嶺州攻邛徠關穆遂不行

原注按南詔已稱帝陷安南豈可彌縫

但欲姑息故陽不知其僭號反以陷安南蠻為土蠻耳通鑑

案邕管安南皆唐地也世隆取之雄則雄矣治理無聞徒傷爭奪故據史詳載之且以闕額入糧之經畧使為永鑒

三年二月南詔復寇安南通鑑

經畧使王寬數來告急朝廷以前湖南觀察使蔡襲代之仍發許滑徐汴荆襄潭鄂等道兵合三萬人授襲以禦之兵勢既盛蠻遂引去十一月南詔帥羣五萬寇安南都護蔡襲告急救發荆南湖南兩道兵三千桂管義征子弟三千詣邕州十二月襲又求益兵敕山南東道發弩手千人赴之時南詔已圍交趾襲嬰城固守救兵不得至通鑑

四年春正月南詔陷交趾通鑑

蔡襲左右皆盡徒步力戰身集十矢欲趣監軍船船已離岸遂溺海死幕僚樊綽携其印浮渡江荆南江西鄂襄州將士四百餘人走至城東水際荆南虞候元惟德等謂衆曰吾輩無船入水則死不若還向城與蠻鬪人以一身易二蠻亦爲有利遂還向城入東羅門蠻不爲備惟德等縱兵殺蠻二千餘人原注張彤錦里耆舊傳載高駢與雲南牒亦云楊思縉都蘭節度蠻書云思縉光高

部領者桃花蠻五六千人耳非謂盡將羣蠻也補國史云蠻衆五萬攻安南非止五六千人也十二月二十一日裸形蠻茫蠻桃花人已在城下蠻書言二十七日逼城者但記見河蠻尋傳蠻之日耳逮夜蠻將楊思

縉始自子城出救之惟德等皆死南詔兩陷交趾留兵二萬使思縉據交趾城谿洞夷獠無遠近皆降之通鑑

案蔡襲忠於守邊勤於考南詔事綽尤善著書敍樸子蠻尋傳蠻裸形蠻望苴子蠻茫蠻從軍見南詔兵畧之衆惜蠻書今有

脫譌耳

七年三月戊寅以河東節度使劉潼爲西川節度使通鑑

西川節度使李福將廷見董成成辭曰皇帝奉天命改正朔請以敵國禮見福不許新唐書

初南詔圍雋州東蠻浪稽部竭力助之遂屠其城卑籠部怨南詔殺其父兄導忠武戍兵襲浪稽滅之南詔由是怨唐南詔遣清平官董成等詣成都節度使李福盛儀衛以見之故事南詔使見節度使拜伏於庭成等曰驃信已應天順人原注南詔自尋夢湊以來自稱驃信夷語君也因僭號自謂應天順人我見節度使當抗禮傳言往返自旦至日中不決將士皆憤怒福乃命梓而毆之因械繫於獄劉潼至鎮釋之奏遣還國詔召成等至京師見於別殿厚賜勞而遣之通鑑

六月南詔酋龍遣鄯闡節度使楊緝思助安南節度使段酋遷守交

趾鑑通

是月駢大破南詔蠻於交趾殺獲甚衆遂圍交趾城十餘日蠻困蹙甚駢復督勵將士攻城遂克之殺酋遷及土蠻爲南詔鄉導者

鑑通

案咸通中柘東節度常以書信將外甥嫁西原七洞主李由獨小男補柘東押衙自此七洞悉爲蠻收可見柘東節度使之遠

猷蠻書云永昌西南有柘南城

明史景東古柘南

柘兪城殆與柘東鼎峙者

當日取名乃重開拓惜有志而無才耳柘拓通用楊緝思即楊思縉南詔節度之雄者段酋遷不知何日莅安南安南節度使不知何日設史既闕載酋遷亦唐改其名猶酋龍酋慶必非南

纂纂

雲南通志

卷四

大事記四

一三三

人本名也夫唐與南詔之爭人名異同之細不必深論惟南詔設安南節度使史書甚明八節度外又增其一南詔且重安南孰敢輕之乎

八年南詔遣楊酋慶來謝釋董成之囚且歸成都俘三千人節度使

李師望殺其使

新唐書南蠻傳

初南詔遣使者楊酋慶來謝釋董成之囚定邊節度使李師望欲激怒南詔以求功遂殺酋慶西川大將恨師望分裂巡屬陰遣人致意南詔使入寇師望貪殘聚私貨以百萬計戍卒怨怒欲生食之師望以計免朝廷徵還以太府少卿竇滂代之滂貪殘又甚於師望故蠻寇未至而定邊固已困矣鑑通

案貪人敗類師望與滂之敗何足怪哉所痛者國事爾

十年南詔驃信酋龍傾國入寇引數萬衆擊董春烏部破之

通鑑引咸通解圍錄

十一月蠻進寇嵩州定邊都頭安再榮守清溪關蠻攻之再榮退屯大渡河北與之隔水相射九月八夜蠻密分軍開道逾雪坡奄至沐源川滂遣袁海將黃卓帥五百人拒之舉軍覆沒十二月丁酉蠻衣袞海之衣詐爲敗卒至江岸呼船已濟衆乃覺之遂陷犍爲縱兵焚掠陵榮二州之境後數日蠻軍大集於陵雲寺與嘉州對岸刺史楊忞與定邊監軍張允瓊勒兵拒之蠻潛遣奇兵自東津濟夾擊官軍殺忠武都將顏慶師餘衆皆潰忞允瓊脫身走壬子陷嘉州慶師慶復之弟也竇滂自將兵拒蠻於大渡河驃信詐遣清平官數人詣滂結和滂與語未畢蠻乘船楫爭渡忠武徐宿兩軍結陳抗之滂懼自經於帳中徐州將苗全緒解之曰都統何

至於是全緒與安再榮及忠武將勒兵出戰滂遂單騎宵遁三將謀曰今衆寡不敵明日復戰吾屬盡矣不若乘夜攻之使之驚亂然後解去於是夜入蠻軍弓弩亂發蠻大驚三將乃全軍引去蠻進陷黎雅民竄匿山谷敗軍所在焚掠滂奔導江邛州軍資儲備皆散於亂兵之手蠻至城已空通行無礙矣

通鑑

十一年攻成都節度副使王建立戰死

新唐書

十一年春正月西川之民間蠻寇將至爭走入成都人所占地各不過一席許雨則戴箕盎以自庇又乏水取摩訶池泥汁澄而飲之將士不習武備節度使盧耽召前瀘州刺史楊慶復共修守備耽遣使告急於朝且請遣使與和以紓一時之患朝廷命知四方館事太僕卿支詳爲宣諭通和使蠻以耽待之恭亦爲之盤桓而

成都守備由是粗完甲子蠻長驅而北陷雙流庚午耽遣節度副使柳槃往見之杜元忠授槃書一通曰此通和之後驃信與軍府相見儀也其儀以王者自處語極驕慢又遣人負綵幕至城南云欲張陳蜀王廳以居驃信癸酉蠻軍抵成都城下成都十將李自孝陰與蠻通欲焚城東倉爲內應城中執而殺之後數日蠻果攻城久之城中無應而止二月癸未朔蠻合梯衝四面攻成都城上以鈎纆挽之使近投火沃油焚之攻者皆死盧耽以楊慶復攝左都押牙李驤各帥突將出戰殺傷蠻二千餘人會暮焚其攻具三千餘物而還蜀人素怯其突將新爲慶復所獎拔且利於厚賞勇氣自倍其不得出者皆憤鬱求奮後數日賊取民籬重沓濕而屈之以爲蓬置人其下舉以抵城而鬪之矢石不能入火不能然慶

復鎔鐵汁以灌之攻者又死乙酉支詳遣使與蠻約和丁亥蠻斂兵請和戊子遣使迎支詳時顏慶復以援軍將至詳謂蠻使曰受詔詣定邊約和今雲南乃圍成都則與曩日詔旨異矣且朝廷所以和者冀其不犯成都也今石矢晝夜相交何謂和平蠻見和使不至庚寅復進攻城辛卯城中出兵擊之乃退以顏慶復爲東川節度使凡援蜀諸軍皆受慶復節制癸巳慶復至新都蠻分兵往拒之甲午與慶復遇慶復大破蠻軍蜀民數千人爭操芟刀白楮以助官軍呼聲震野乙未蠻步騎數萬復至會右武衛上將軍宋威以忠武二千人至即與諸軍會戰蠻軍大敗退保星宿山威進軍沱江驛距成都三十里蠻遣其臣楊定保詣支詳請和詳曰宜先解圍退軍定保還蠻圍城如故戊戌蠻復請和使者十返城中

亦依違答之蠻以援軍在近攻城尤急驃信以下親立矢石之間
庚子官軍至城下與蠻戰奪其升遷橋是夕蠻自燒攻具遁去比
明官軍乃覺之初朝廷使顏慶復救成都命宋威屯綿漢爲後繼
威乘勝先至城下破蠻兵功居多

十二年三月鑄崇聖寺鐘

案世隆立于唐懿宗咸通元年庚辰改元建極則建極十二年
辛卯即咸通十二年此鐘今猶存又有彌渡鐵柱建極十三年
壬辰四月立皆可見其工藝文字佛學之盛不止爲僭元之證

立鄯闡王宮

胡本野史

案自此以後蒙氏多居於鄯闡疑即十二年立宮之故

十四年南詔寇西川又寇黔南

通鑑

新纂雲南通志

卷四 大事記四

一一六

僖宗乾符元年南詔寇西川陷黎州入峽關

舊唐書

乾符元年十一月南詔寇西川作浮梁濟大渡河防河都知兵馬
使黎州刺史黃景復俟其半濟擊之蠻敗走斷其浮梁蠻以中軍
多張旗幟當其前而分兵潛出上下流各二十里夜作浮梁詰朝
俱濟襲破諸城柵夾攻景復力戰三日景復陽敗走蠻盡銳追之
景復設三伏以待之蠻過三分之二乃發伏擊之蠻兵大敗追至
大渡河南而還復修完城柵而守之蠻歸至之羅谷遇國中發兵
繼至新舊相合鉦鼓聲聞數十里復寇大渡河與唐夾水而軍詐
云求和又自上下流潛濟與景復戰連日西川援軍不至而蠻衆
日益景復不能支軍遂潰南詔乘勝陷黎州入邛峽關攻雅州大
渡河潰兵奔入邛州成都驚擾民爭入城或北奔他州城中大爲

守備而塹壘比鄰時嚴固驃信使其坦綽遺節度使牛叢書云非敢爲寇也欲入見天子面訴數十年讒人離間冤抑之事倘蒙聖恩矜恤當還與尙書永敦鄰好今假道貴府欲借蜀王廳留止數日即東上叢素懦怯欲許之楊慶復以爲不可斬其使者留二人授以書遣還書辭極數其罪詈辱之蠻兵及新津而還

原注考異曰錦里耆舊傳咸通十四年十一月五日雲南蠻寇再犯大渡河黃景復擊敗之十二月二十五日復攻大渡河三十日蠻乘勝進攻黎州十二月二十八日蠻來只到新津前後蜀州界左右便退竟不到城下按咸通十四年南詔寇西川事舊紀南詔僭唐年補錄唐錄備闕續實錄皆無之獨著舊傳載之甚詳新書取之作南詔傳而實錄但云十二月西川奏南蠻入寇黎州蓋亦出於舊傳耳舊紀乾符元年冬南詔蠻寇西蜀詔河西河東山南西道東川徵兵赴援實錄乾符元年十月西川奏雲南蠻入寇十二月雲南蠻寇西川坦綽致書於牛叢欲求入覲河東山南西道及東川兵援之月末又雲南蠻侵犯黎州而成都守禦無備殊不拒敵踰河越嶺洞無難障賴積雪丈餘遂阻隔奔衝之勢又邛雅二州刺史望風奔遁蠻燒劫一空牛叢不曉兵失於探候而奏報差戾詔切責之蠻略劫黎雅間破黎

州入邛崃關成都閉三月乃去新紀乾符元年十二月雲南蠻寇黎雅二州河西河東山南東道東川兵伐雲南按實錄咸通十四年十一月七日路巖始移荆南八日牛叢始除西川而考舊傳蠻入寇皆叢任內事恐誤先一年也實錄新紀因此於十四年十二月添雲南寇黎州事實皆在乾符元年冬也 詔發河東山南西道東川兵援之仍命天平節度使

高駢詣西川制置蠻事

新纂雲南通志

卷四 大事記四

一一七

案胡氏三省詳考滇事其精如此

駢至成都明日發步騎五千追南詔至大渡河擒其酋長數十人至成都斬之修復邛崃關大渡河諸城柵又築城於戎州馬湖鎮號平夷軍又築城於沐源川皆蠻入蜀之要路也各置兵數千戍之自是蠻不復入寇駢又奏請自將本管及天平昭義義成等軍共六萬人擊南詔詔不許先是南詔督爽屢牒中書辭語怨望中書不答盧攜奏稱如此則蠻益驕謂唐無以答宜數其十代受恩以責之然自中書發牒則嫌於體敵請賜高駢及嶺南節度使辛讜詔使錄詔白牒與之從之

通鑑

案南詔之盛始於皮羅閣閣羅鳳其強在境內及西南邊外耳異牟尋強制藏緬而對於中朝最恭順世隆雖強而侵川侵黔

入邕入安南雖強於境外若有虛名而使唐人疲敝人已兩損可以鑒矣

又案莊躡開滇池平地肥饒數千里以兵威屬定楚詳史記之文義數千里不必盡為滇國屬地然兵威亦已定之則拓境已數千里兩爨時則二千里

蠻書安南經交趾數千里皆爨蠻安南境

南詔最擴新唐書云再入

安南邕管一破黔州四盜西川蓋蜀黔

新唐書世隆陷播州今遵義府

桂新唐書世隆攻邕管經略使李宏源不能制奔蠻州

云又七緒附洞舉蠻王

藏

樊綽云牟尋破東西城置兵守之又云吐蕃鐵橋節度並屬蠻管貞元十七年南詔攻吐蕃心腹俘獲最多通鑑云取吐蕃昆明城

之邊均有屬土緬交

更其顯者

新唐書驃國傳南詔常羈制之南詔傳開羅風破越析梟于贈西降尋傳緬諸國蠻咸通三年十二月二十七日蠻過交州城池又云女王國去鎮南節度三十餘日程蠻以二萬人伐之又領軍馬至海

蓋自來滇境之廣無踰南詔時矣

大蒙知軍事布燮楊禎淑興寶寺

興寶寺碑文云年鐘建極口佐兵口口蜀衡蕃惟公是倚外則弼

諧帝道事竭於君內則翼扇真風心亡於法卜茲勝地淑此精藍

案宋碑可寶布燮好佛亦滇俗也年在建極故附世隆之末

四年酋龍卒諡曰景莊皇帝子法立國號鶴柘

通鑑

在位十八年卒於越嵩景淨寺

野史

案世隆之時用兵最多蜀中尤甚今越嵩一帶寓蜀之滇人會

館咸祀世隆且稱曰景莊帝蓋沿其偽諡也

又案唐賜皮羅閣雲南王異牟尋請仍稱南詔詔即王也故袁

滋持印曰貞元册南詔印蓋南詔爵名非國名也世隆稱帝始

有大禮國名蒙法又改鶴柘復舊名也

又案新唐書法在鄯闡問唐使春秋大義法為世隆子與通鑑

合乃滇載記誤世隆子名隆舜反謂南詔名父子相承通鑑作

法爲誤不知自豐祐時早改父子連名也

六年嶺南節度使辛讜遣使徐雲虔如南詔唐會要

辛讜奏南詔遣陁西段瑳寶來請和詔許之讜遣大將杜宏等齎

書幣送瑳寶還

通鑑

二月雲虔至鄯闡城驃信見大使抗禮受副使已下拜已巳驃信使慈雙羽楊宗就館謂雲虔曰貴府牒欲使驃信稱臣奏表貢方物驃信已遣人自西川入唐與唐約爲兄弟不則舅甥夫兄弟舅甥書幣而已何表貢之有雲虔曰驃信旣欲爲弟爲甥驃信景莊之子景莊豈無兄弟於驃信爲諸父驃信爲君則諸父皆稱臣況弟與甥乎且驃信之先由大唐之命得合六詔爲一恩德深厚中間小忿罪在邊鄙今驃信欲修舊好豈可違祖宗之故事乎順祖

考孝也事大國義也息戰爭仁也審名分禮也四者皆令德也可不勉乎驃信待雲虔甚厚雲虔留鄯闡十七日而還驃信以木夾二授雲虔其一上中書門下其一牒嶺南西道然猶未肯奉表稱貢

通鑑

案景莊僭號乃述於唐使之口悲哉中朝之不競也然以南中一姓之強竟能抗唐至此亦奇矣哉

又案鄯闡本南詔別都故徐雲虔至此蠻書云安南兵馬使郭延宗曾奉使柘東住一月日館穀勤厚贈遺不輕可與厚待雲虔之文證明南詔之厚意

六月陳敬瑄奏請遣使和

蠻通鑑引實錄

盧携豆盧瑑上言大中之末府庫充實自咸通以來蠻兩陷安南

邕管一入黔中四犯西川徵兵運糧天下疲弊踰十五年租賦大半不入京師三使內庫由茲空竭戰士死于瘴癘百姓因爲盜賊致中原榛杞皆蠻故也前歲冬蠻不爲寇由趙宗政未歸去歲冬蠻不爲寇由徐雲虔復命蠻尙有覬望今安南子城爲叛卒所據節度使攻之未下自餘戍卒多已自歸邕管客軍又減其半冬期且至倘蠻寇侵軼何以枝梧不若且遣使臣報復縱未得其稱臣奉貢且不使之懷怨益深堅決犯邊則可矣乃作詔賜陳敬瑄許其和親不稱臣令敬瑄錄詔白并移書與之仍增賜金帛以嗣曹王龜年爲宗正少卿充使以徐雲虔爲副使別遣內使共齎詣南

詔通鑑

乾符六年遣使於唐求和親但用牒稱弟不稱臣野史

案唐之受辱至矣始述景莊僞帝號終許蒙法不稱臣外侮由于內崩詎不然歟

中和二年南詔上書請早降公主通鑑

胡氏三省曰嗣曹王龜年之使南詔也上以宗室女爲安化長公主許婚考異曰張彤耆舊傳中和元年九月三十日雲南驃信差布變楊奇肱等齎國信來通和迎公主太師借副使儀注郊迎布變始相見揖副使云請不拜太師怒朝廷告以俟更議車服制數定續有旨命竟空還

昭宗龍紀元年以王建制授檢校太傅成都尹西川節度副大使知節度事管內觀察處置雲南八國招撫等使五代史王建傳

案新史太傅作司徒龍紀元年作大順二年

又案王建命官與韋皋同不可不采八國見韋皋傳唐季紛亂
兩林勿鄧之類亦稱國耳故繫屬於雲南下

乾寧四年楊登弒隆舜子舜化貞嗣

滇載記

舜化立中國亂不復通

唐書

舜化貞立四年鄭買嗣奪之而滅其國蒙氏十三世立三百十年

滇載記

王氏崧曰蒙自唐高宗永徽癸丑至昭宗天復壬戌二百五十年

滇載記誤

案滇載記本於楚文荔屏稱其愜心樂山摘其誤記愚信其雅
飭而疑其舛誤隨事糾正近人有譏其淺薄疏陋者且云其記
十三世即位之年錯誤者七無根據者四與史事合者僅二顛

新纂雲南通志

卷四 大事記四

三二一

倒若此亦可驚異

詳見旅平學會雜誌三期

可知人同此心心同此理也

中古代第七期

始唐昭宗天復二年壬戌迄後唐末帝清泰二年乙未凡三十

四年

即公〇〇二年至九三五年

唐昭宗天復二年南詔清平官鄭買嗣奪蒙氏而滅之僭號大長和

國

南詔野史

案蒙氏之時中原名人如駱賓王李善鄭回袁滋徐雲虔均入
滇韋皋竇滂盧攜均與滇交接樊綽雖未入滇久居交州博聞
卓識而滇人亦往往觀光中原種種著述見於新舊唐宋史志
通鑑通鑑注諸書幾千百種故昫祁新舊南詔傳博洽極矣至
於鄭趙楊段之遞嬗則傳聞多異買嗣仁旻之外大抵出於元

人張道宗記古滇說李京雲南志略張書疑人偽託李書疑非足本明人楊慎滇載記阮元聲南詔野史今最盛傳各舊通志抄襲而已愚證之五代會要新舊五代史宋史元史范成大沈括胡三省馬端臨虞集章潢諸書往往不同何耶今擇存其可信者若其可疑不能不分別觀之也

梁末帝乾化四年南詔寇黎州

通鑑

買嗣死旻立攻黎州王建大破之

滇載記

案唐之末年唐衰滇亦衰迄於五代滇殆不知唐已亡故長和國奏疏猶上唐皇帝舅唐亦不知蒙爲鄭篡故長和寇黎通鑑猶沿舊文而書南詔也

後唐莊宗同光元年南詔以朱髻白馬求婚南漢南漢以增城公主

新纂雲南通志

卷四 大事記四

三二一

妻之

滇繫

新五代史南漢世家劉龔立七年雲南驃信鄭旻遣使致朱髻白馬以求婚使者自稱皇親母弟清容布燮兼理賜金錦袍虎綬紋攀金裝刀封歸仁慶侯食邑一千戶持節鄭昭淳昭淳有文辭龔與游燕賦詩龔及羣臣皆不能逮遂以隱女增城縣主妻旻通鑑同光三年長和驃信鄭文遣其布燮鄭昭淳求婚於漢長和即唐雲南詔也

王崧本野史作鄭仁明

仁明即仁旻亦即旻即文

王式丹南漢宮詞詔許長和逆國妃殿前稽顙虎綬衣自注長和國驃信鄭仁旻遣弟昭淳致朱髻白馬以求婚妻以增城公主長

和即南詔

江左十五子詩選

王氏崧曰同光二年南漢以襄帝女增城公主妻仁明見十國春

秋野史注

案滇人之文冠於內地且見正史以昭淳為首而歷代滇人歷次通志無一表章之僅僅沿野史中一二淺說以為全滇之信史何耶

布燮段義宗判官贊衛姚岑等使蜀何光遠鑿誠錄

何氏光遠曰蜀後主乾德中南蠻選布燮段義宗判官贊衛姚岑等為使入蜀義宗不欲朝拜遂禿削為僧號曰大長和國左街崇金寺賜紫沙門銀鉢既而屈蜀羣臣議奏僧有胡有宜令禮拜義宗于是失節焉至於談論敷奏道德一歌一詠捷應如流有題大慈寺芍藥詩浮花不與眾花同為感高僧護法功繁影夜鋪方丈

月異香朝散講筵風尋真自得心源靜夜色非貪眼界空好似芳馨堪供養天教生在石門中又題三學院經樓二詩又題判官贊衛聽歌妓洞雲歌又思鄉五律二詩均見滇南詩略惟有數字不同今不錄詩略又謂布燮為董成非如此製作實為高手義宗生居蠻貊蔑有漢原注前蜀號大漢國口口頗生輕國師常瑩辯黃光業等酬酢偈句皆失機宜口口還遇酖而卒議者以南康王韋皋于沈黎大興饗序口口遂至夷亂華風文流異域自有唐朝觀罕有口口俗之間無不繕寫洞雲歌行者也鑿誠錄

案義宗入朝新唐書謂與趙隆眉楊奇鯤同行高駢在揚州聞之密奏曰三人南詔謀臣宜酖之南詔遂弱考宋祁作書遠在何光遠之後疑趙楊被酖乃唐大中中事義宗遇酖乃蜀乾德中事蓋義宗使蜀非使唐大長和臣非蒙氏臣何氏親見之故

著書明載之疑不有誤宋氏書合二事爲一事也蜀後主爲王衍自梁貞明己卯立唐同光乙酉亡義宗事當在此七年中耳

三年郭崇韜平蜀遣使入蠻部

五代會要

大長和國上奏疏

五代會要

胡三省通鑑注引五代會要曰郭崇韜平蜀之後得王衍所得蠻俘數十以天子命令使人入其部被止于界上惟國信蠻俘得往續有轉牒稱督爽大長和國宰相布燮等上大唐皇帝舅奏疏一封差人轉送黎州其紙厚硬如皮筆力適健有詔體後有督爽陀曾忍爽王寶督彌勒忍爽董德義督爽長垣禕忍爽楊希燮等所署有采牋一軸轉韻詩一章章三韻共十聯有類擊筑詞頗有本朝姻親之意語亦不遜

新纂雲南通志

卷四 大事記四

三四

案胡氏博極羣書而通鑑五代時之注乃不引鄭買嗣趙善政楊干貞之一字斯亦異事也鄭旻見通鑑長和見通鑑則買嗣可信然會要謂轉牒上大唐皇帝舅又有本朝姻親之意殊不合鄭氏口吻意者交通梗阻鄭氏不知中朝已易梁唐故仍稱舅稱姻親也

三年魏王繼岌招撫南詔諭以威德南詔不納

新五代史四夷附錄

魏王繼岌奏遣秦州副使徐藹齎書招諭南詔蠻

舊五代史唐莊宗紀

以孟知祥爲檢校太傅同平章事成都尹劍南西川節度副大使知節度事西山八國雲南都招撫等使

舊五代史唐莊宗紀

案雲南之官雖未至滇而與姚萇韋皋王建同故采之

明宗天成元年李彥楷等使雲南

十月丁亥雲南嵩州山後兩林百蠻都鬼主右武衛大將軍李卑晚遣大鬼主傅能何華等來朝貢帝御文明殿對之百僚稱賀舊五代史明宗本紀

供奉官李彥楷等雲南使回李卑晚等來朝貢明宗引見加官遣

還通考

丙午以兩林百蠻都鬼主李卑晚爲寧遠將軍大渡河山前邛川六姓都鬼主懷安郡王勿鄧標莎爲定遠將軍十二月戊子詔曰朕中興寶祚復正皇綱萬國駢羅俱在照臨之內八紘遼窶咸居覆載之間矧彼雲南素歸正朔泊平僞蜀思錫舊恩于乃睠以雖深按句有訛字武英殿本亦未考證欲需覃而未暇百蠻都首領李卑晚六姓蠻都首領勿鄧標莎等天資智勇世稟忠勤梯航之道路纒通琛賚之貢輸已至率其種落竭乃悃誠備傾向化之心深獎來庭之意今則各

頒圖寵別進王封其嵩州刺史李及大鬼主離吠等或遙貢表函或躬趨朝闕亦宜特授官資各遷階級勉敦信義無墜冊書示爾金石之堅保我山河之誓欽承休命永保厥終舊五代史

案新史載此事而不詳又未載明宗詔書失之略也滇志無采此者竊謂詔中明言矧彼雲南素歸正朔則李卑晚等雖在蜀邊而自開天以後早爲滇屬勿疑唐明宗直謂滇屬之地滇屬之人而可輕略之耶

二年七月遣使入蠻通考

二年八月乙酉昆明大鬼主羅殿王普露靜王九部落各差使隨牂牁清州八郡刺史宋朝化等一百三十五人來朝進方物各賜官告繒綵銀器放還番舊五代史

案滇境甚寬蕃義甚泛正史通考皆可存之

九月西川奏黎州狀申雲南使趙和於大渡河南起舍一間留信物十五籠並雜詩一卷遞至闕下通考

舊五代史唐明宗本紀九月戊寅西川奏據黎州狀雲州使趙和于大渡河南起舍一間留信物十五籠並雜箋詩一卷遞至闕下

按雲州當作雲南文獻通考載趙和事正作雲南武英殿本舊史乃邵二雲一人考證免漏此條百密之一疏也

袁不鈞曰文獻通考四裔考南詔略載唐明宗天成二年七月遣使入蠻九月西川奏據黎州狀申雲南使趙和於大渡河南起舍一間留信物十五籠並雜詩一卷遞至闕下今其所謂雜詩者不可得而傳然五代之世中原銅蔽歐陽公所嘗歔歔而太息者以邊鄙化外之地而有此一卷之詩則亦尙論古人者所不廢矣

案後唐天成中正滇中鄭趙楊爭位之時據野史則隆亶善政干貞之徒昏亂極矣豈知遣使入川者其君如彼其昏也豈能有臣如趙和者耶况獻詩一卷與同光中鄭昭淳詩冠南漢段義宗詩播西川王寶董德義長垣禕楊希變等所署之采牋轉韵詩可稱五代時滇詩之佳話也野史諸書僅載鄭趙楊段四酋長爭位之事而於一方之文化民風可以想像表章者反不一及惜哉

備覽○三年東川節度使楊干貞弑鄭隆亶而立趙善政改國號大

天興

滇載記

備覽○四年楊干貞廢趙善政自立改國號曰大義寧滇載記

案張道宗記古滇說云鄭買嗣後趙善政楊干貞遞相篡位三

主共三十六年而李京以爲四主楊慎阮元聲以爲五主是人數且不合也人事可輕信乎抄本野史云善政天成三年即位次年改元三年改國號六月楊干貞廢之又與各書在位十月不合范志演繫則謂同光元年善政立尤爲難信且元史地理志姜州下言隸於鄭趙楊段而建水州下言隸於楊李趙段數姓若演載記字字足信則元史之李字將何解乎安寧縣下又言隸孫氏袁氏高氏或僅一部之長今不必全廢諸書但亦不敢全信之故列入備覽以俟定論章潢圖書編作楊趙段殆筆誤

又案元史地理志乃宋濂等據元史館檔冊而成元冊又據雲南迭迭之四十八冊而存者故極可信惜此冊僅存目於廣倉

學窘叢書中耳

又案趙楊二國之竊據爲日無多不見于溫公身之貴與諸著錄亦可不辨所不解者野史諸書又加以山神助柴水龍照影諸怪徵甚且以石裂紅字曰善政爲天子云云不得不斥爲稗書下乘也

又案南詔野史一書今見者有三本一胡蔚本

乾隆刻簡稱胡本

一王崧本

道光刻簡稱王本一舊抄本

內有元泰定致和元年明太祖誕生一條確爲明本又附王思訓詩胡蔚詩確爲乾隆後再抄本

胡本通行最廣愚幼

讀而服之因其詞潔而例明且三十七蠻部南詔古跡二篇他

本罕詳也壯閱各籍乃漸疑之知野史原本乃阮元聲撰

四庫提要

元聲之本有楊慎序略云得滇人倪輅所集野史一冊因薈萃成

編名曰南詔野史有四善焉辨方也訊俗也好古也傳後也

胡本有楊

氏此序
王本無

按此僞序也四善乃楊氏作張道宗記古滇說序中之文
阮氏撫之意取真文實露僞迹愚觀記古滇說支離淺複乃楊
氏見於沐朝輔邸者沐安得有宋祕籍又安能序張書而繁徵
博引耶楊氏包辦殆無疑義四庫提要云楊氏僞作故謬其詞
以惑人是也然楊氏作僞之本心則尙未推言愚以爲楊氏博
學高才孤忠遠謫窮愁著書蜀之光滇之師久有定論惟遊戲
神通往往欺世升庵集中有滇載記一卷云求蒙段之故而不
得問其籍於舊家有白古通玄峰年運志其書用楚文義兼衆
教稍爲刪正令其可讀遂纂以爲滇載記愚讀之雅飭完美確
爲名作惟謂譯於舊家楚文楚文究何如乎舊家究何家乎遠
之如仁果龍佑那之牴牾正史近之如大天興大義寧之單詞

孤證楊氏蓋自覺無徵乃作記古滇說屬之沐氏俾與滇載記
互相表裏此記古滇說滇載記二書之根也不意阮氏元聲南
詔野史託之楊氏一則攀附重名一則因全襲滇載記之書以
入其書此滇載記野史二書之根也故僞撰楊序而又謂楊本
于倪實則倪亦烏有先生而已明史藝文志收倪輅野史乃誤
據僞楊序之文四庫提要始揭明阮元聲而又不料乾隆中胡
本盛行不倪不阮直標楊慎編輯胡蔚訂正道光中王本再出
即備徵志
之一種雖亂絲就理標明阮作而原本一誤再誤仍不能免如滇
載記云張樂進求遜位蒙氏胡本從之而王本增一詞云蒙滅
張氏滇載記云楊干貞殺鄭氏復奪趙氏胡本王本又增一事
云蒙隆舜私于干貞母有孕適楊豈古書古事可以隨意增改

乎姑舉一二以明楊阮胡王諸書有不可盡信者非好異也求真也慎也多聞闕疑以俟君子

南甯州酋長莫彥殊率其本部十八州都雲酋長尹懷昌率其昆明等十二部牂牁張萬濬率其夷播等七州皆附於馬希範

舊五代史楚世家

案南甯州之地自爨迄蒙皆爲滇屬酋長莫氏豈非滇人昆明在漢爲滇西境後則蜀境吐蕃境皆有昆明滇東北亦有昆明

志岑

蓋游牧民族隨徙而名之也牂牁自莊躡改名隸於滇王迄

漢列郡所領之縣屬滇者約十之三屬黔者約十之七今之附楚者三人尹張則或黔或蜀不可知莫則滇人無疑矣談五代時之滇事者若專囿于趙善政楊干貞輩則滇爲紛紛昏亂之國若參考鄭昭淳趙和莫彥殊諸人則滇仍風雅彬彬寮案秩秩中州名郡冠帶往來有可想像而得之者已

又案新五代史南詔傳王氏崧收入備徵志舊史南詔無傳不贅舊五代史外國傳昆明部落其俗椎髻跣足酋長披虎皮下者披氍僅十九字殆永樂大典脫佚非本傳僅此也新史多數十字不能謂與滇無涉輯附卷末俾論古滇事者參焉

又案王鳳文雲龍紀往云夷族無姓氏阿苗生四子始以父名爲姓苗難苗丹苗委苗跖四子分占江之上下布阿苗德威夷衆咸服稱曰四方天王阿苗沒諸子相妬忌勢浸弱惟苗丹能治服諸夷又云武侯南征孟獲敗兵迷路至此與土人語及漢人姓氏屏喇效之即以喇爲姓夷人亦各自取姓又云屏喇傳四五世至喇烏阿苗乃絕岑志云夷人無文字故老相傳未必

確實姑置之五代宋之末以從其實卷一百九十王氏全文收入備徵

志當以岑志之評為允聊備覽耳

又案麗江木氏宦譜唐德宗貞元五年普蒙為麗水節度使昭宗乾寧四年傳四代楊登弒南詔改武勳侯光化元年舜化真立傳子俄均歷後唐明宗鄭趙楊篡僭與之連和修好生子牟具等六人各分部為諸夷之長牟具當晉天福中段思平始自立傳二世牟磋更立摩娑詔大酋長段氏莫能有二傳有阿琮即麥琮不學而知文字旁通百蠻諸方書制本方文字岑志引家譜未足信聊見當時滇俗種種殊異決不可囿於鄭趙楊段之爭國遂賅括五代時之滇事耳

中古代第八期

始後晉天福元年丙申迄宋理宗淳祐十一年辛亥凡三百

一十六年即公曆九三六年至一二五一年

後晉天福元年通海節度使段思平討于貞于貞走死滇載記

二年思平即位建都大理土本野史

備覽○善巨守高方遣人招思平借兵三十七部助之滇考

案高氏始終忠段如沐氏始終忠明高方借兵理或有之惟僅

見滇考姑列備覽

段氏僭號大理國李志引舊志

段氏開科取士野史

所取悉能讀儒書者鈔本野史

段氏使烏蠻阿歷治武定名羅婺部皇朝職貢圖

宋太祖乾德三年王全斌平蜀畢沅續資治通鑑

全斌欲乘勢取雲南以圖獻帝以玉斧畫大渡河以西曰此外非

吾有也畢通鑑

畢氏沅曰玉斧畫大渡河事宋史本紀不載別見宋史宇文昌齡

傳又見方輿勝覽宋題名記畢通鑑

案李志云舊志謂在建隆三年全斌平蜀在乾德非也今正之

此李志勝舊志者

備覽○五年西南夷南甯州蕃落龍彥瑫等來貢詔授彥瑫歸德將

軍南甯州刺史蕃落使宋史蠻夷傳

案此殆古黔地屬滇者故明言南甯州蕃落

開寶四年布燮皇叔段子珍盟三十七部於石城

明政三年歲次辛未宣諭躡奉承眷旨統率戎行委服皆恩撫安

邊塞是以剪除返衆鎮長奇宗求州首領代連弄兔覆磨乃等三

邑口置返衆鎮以二月八日迴軍至三月七日到口城更討打賊

即羽口阿房口洞合集州七部娉伽諾十二將弄略等於四月九

日研羅沙一遍兼頒賜職賞故廼其約盟誓務存人長上對衆聖

之鑒知下揆一德而帖血三軍都統皇叔布燮段子珍石城碑

王氏崧曰素順開寶二年即位滇載記以為建隆四年立誤王本野史

喻氏懷信曰明政三年辛未即宋開寶四年碑今在曲靖城碑跋

案段氏之興三十七部助之故子珍莅此而盟官制官名兵略

版章皇族土民皆可於此碑覘之而文體之排比字體之勁肆

尤足見大理一代滇人之文化云

又案元泰定二年杜昌海墓銘文云大理國彥賁杜青之八世孫與此碑布燮等皆段沿蒙稱之證

備覽○太宗淳化五年辛怡顯賜蠻酋誥敕文獻通考經籍考

經籍考李順亂蜀餘黨有散入蠻中者怡顯往招安之繼馳賜蠻酋誥敕而歸

案李志作怡顯使南詔

備覽○仁宗嘉祐二年建姚州以得蓋為刺史宋史蠻夷傳

案此殆大渡河內之夷也因史言得蓋為爨裔且傍舊姚州故采之

慶歷八年命高智昇伐楊允賢克之賜白崖莊甸地方王本野史

高智昇為鄯闡牧遂世其地明史土司傳

高智昇使其孫大惠鎮北勝

案元史地理志云段氏時高政治會川明史土司傳云元憲宗三年北勝內附可見宋元時高氏之盛

皇祐五年以狄青為荆湖宣撫使討儂智高智高走大理思廣募死

士求之函首京師宋史蕭汪傳及交趾四裔考

馬氏端臨曰智高敗奔大理其國捕之以聞通考

神宗熙寧九年遣使貢金裝碧玕山氈扇刀劍犀皮甲鞍轡宋史外國大理傳

馬氏端臨曰遣使貢方物自後不常來亦不領於鴻臚通考

存疑○元豐三年楊干貞殺段廉義四月岳侯高智昇命其子昇泰

起東川兵誅之而立廉義之姪壽輝加智昇太保封德侯野史

案五代時宋時皆有楊干貞之名何以混淆若是又皆弑君者

尤奇也或改作義貞

存疑○哲宗元符二年高昇泰立國改國號大中國演載記

宋氏謙曰昇泰執大理國柄元史地理志

王氏崧曰宋紹聖元年國人立高昇泰國號大中在位二年演載

記昇泰以宋哲宗元符二年立誤史野

案演載記謂昇泰改元上治令其子仍還段氏號後理國據元

史僅執國柄據楚雄德運碑則大中國公乃高氏量成之姪壽

貞私人之名號非國名也疑涉筆而誤大中國既誤則後理國

亦誤因後理不詞且無他證也

徽宗崇寧二年癸未段正純使高太連入宋求經書六十九家樂書

六十二本史野

鄯闡高觀音來朝史野

存疑○緬人崑崙波斯同進白象方物史野

案緬人進物於大理是已崑崙波斯疑為夸詞

政和五年廣州觀察使黃璘奏大理國慕義懷徠史野

六年遣進奉使天駟爽彥賁李紫琮副使坦綽李伯祥來畢通鑑

紫琮過鼎州聞學校文物之盛請于押伴求詣學瞻宣聖像邵守

張察許之遂往遍謁見諸生又乞觀御書閣舉笏叩首大理傳

七年二月紫琮等至京師貢馬三百八十四匹及麝香牛黃細氈碧玕

諸山諸物詔以其主段和譽為金紫光祿大夫檢校司空雲南節度

使大理國王畢通鑑

案宋史段和譽南詔野史無此名又文獻通考觀御書閣下有

閱讀御製四字雲南節度使上有上柱國三字較續通鑑詳

又案宋史以政和六年丙申大理國王段和譽使天駟爽彥賁李

紫琮副使坦綽李伯祥來朝其官名與石城碑同真信史也乃

滇載記野史不以爲和譽而以爲正嚴正嚴立于大觀二年戊子

日至紹興六年丙辰貢象在位四十年戊辰不知何以差異

高宗紹興三年廣西奏大理求入貢卻之畢通鑑

大理國人欲進奉及賣馬上曰令賣馬進奉可勿許通考

案野史云自是不通中國

六年廣西經略安撫司奏大理貢象馬詔護送行在所優禮答之畢通鑑

翰林學士朱震言大理國本唐南詔大中咸通間入成都犯邕管

召兵東方天下騷動藝祖鑒唐之禍乃棄越嶲諸郡以大渡河東

爲界欲寇不能欲臣不得最得禦戎之上策今國甫市戰馬馬通

道遠夷其王和譽遣清平官入獻方物陛下置其直却馴象賜敕

書往桂林遣之是亦藝祖之意也然臣有私憂不可不爲陛下言

之今日干戈未息戰馬爲急桂林招買勢不可輟然而所可慮者

蠻人熟知險易商賈囊橐爲姦審我之利害伺我之虛實安知無

大中咸通之事願密諭廣西帥臣凡市馬之所皆用謹信可任之

士勿任輕狻生事之人務使羈縻而已異時西北路通漸減廣馬

庶幾消患未然詔箭與廣西帥臣畢通鑑

孝宗乾道九年大理李觀音得董六斤黑張般若師二十三人至橫

山寨議市馬桂海虞衡志

虞衡志未畧利正

野史段正康以乾道八年壬辰立改元利貞丁酉改元元亨辛丑改元嘉會乙巳改元亨利又改安定滇載記多盛德在位二十九年慶元六年卒

案宋諱貞故衡虞志云利正此足證野史之有可信者

又案范氏此文今本佚之据通考引志云其人皆有禮儀可見其人品又有詩句云言音未會意相和遠隔江山萬里多可見其詩學又有一文畧云君子和而不同小人同而不和今兩國之人不期而會者豈不習聞夫子之言哉可見其文采師氏範云李特大理細民聖賢

行賈殊非奉使乃引夫子六經語孟已家絃戶誦矣

又購書十數種有儒書佛書文選字書韻書類書

醫書可見其民風又載其擎誦佛書碧紙金銀字相間邕人得其大悲經稱為坦綽趙般若祈禳目疾而書可見其吏才猗歟休哉令人神往

淳熙二年知靜江府張栻令邕管提舉司精選峒丁以制大理畢通鑑張栻奏自邕之西北有牂牁大理羅甸西南有白衣九道安南諸國皆其所當備者

寧宗慶元時段智廉使入宋取大藏經置五華樓凡一千四百六十五部野史

理宗淳祐元年黎守閩師古言大理請道黎雅入貢安撫使孟珙卻之使道邕廣李志引珙本傳謝肇淛演略

案此為宋代不許滇蜀交通之一證

又案自此以後元與大理之關繫不可一日闕宋雖未亡而滇已屬元故悉以元紀年非有他也